

JENT

L bacan Enrico cer da se maridar

L joen da Soraga à tout part a la sesta edizion del docu-reality de Gabriele Corsi jit fora su Nove

Via per l meis de otober del an passà su Nove l é jit fora la sesta edizion del docu-reality «Il contadino cerca moglie 2022» con la conduzion de Gabriele Corsi. Chi che ge à vardà se à fat na gran marevea a veder che anter i 5 protagonisc l era ence l joen bacan de 24 egn da Soraga Enrico Tarquini, fi di gestores del Soggiorno Don Orione. Duc lo cognosc desche l Nol e el te sia prejentazion l à spiegà che l vegn da la parola 'bacanol', picol bacan, che l é coche i ge à semper dit te Fascia. Se aon fat contar da Enrico coche la é jita chesta soa esperienza televisiva.

La Usc Co éla stata che tu as tout part al program?

Enrico Tarquini L é stat doi mie amisc, Arianna e Giuseppe, che mingol da sconet me à scrit ite a chest program. Gio no ere d'acort e ge é dit: «Na, na, no stajé a me scriver ite...» ma na di i me à chiamà a me dir che i fossa vegnui su a registrar mia prejentazion. Gio no volee, ma ajache son un che ge stasc al jech, me piasc far mingol da mat, me é pissà de tor su l'endesfida.

E co éla jita?

De marz chi de la produzion i é vegnui su a vardar mia azienda a e rejonar con me, i à registrà n video de prejentazion e i me à dit che i me aessa fat a saer canche aesse cognù jir a Roma a registrar la pruma puntata. Ai 29 de jugn son jit ju. Aló cognee cerner fora trei beze sun cater. Ai 2 de messal i é vegnui su te val a registrar l program con cheste beze e i é stac su cinch dis a do a do. Una de cheste beze é cognù la eliminar do l prim di e una de cheste é cognù la tegnir per far la scena finala.

Olà aste l'azienda da bacan?

Acà set egn me é comprà na azienda fora Molina. Chiò é 65 vace, 35 da lat e l rest armentarole, manse e vedie. Jà da bez picol me à semper piàjù far l bacan, é tacà da na picola



Enrico tel video de prejentazion.



Enrico Tarquini con soa sor e si giatves, da ic l à ciapà la pascion per far l bacan.

stala dapò l é vegnù fora chesta possibilità e me la é tutta. Gio ge é semper cardù e son jit inant zenza scutar nesciugn, tant tel ben che tel mal. L é na vita che te dasc n muie, a mi la me dasc la libertà, n modo de viver che per me l é beliscim.

Aste valugn che te deida?

N é ben doi che me deida, la man cencia e chela drete (l se grigna) ma me tocia lurar semper a mi.

Co éle state le registrazion e can él jit fora l program?

I era beleche de 30 a tor ju, anter autores, regisc, microfonic, chi che tol ju con le telecamere. I é stac chiò te stala, dapò i à tout ju valch scena te paisc, da n mie amich e te alberch a Soraga.

I volea che fajesse descheche i volea ic, gio ge é dit de no, che i se volea far l program i cognea azetar descheche son, se no no se fajea nia.

Gio no son n ator, son n bacan. Ic ben segur i volea far audience... L program é jit fora de otober, en dut l é stat 6 puntate.

Le touse erele atore o ge cherdeele?

Doi le fajea ben dassen, una enveze gio die che la era ben demò aló per far televijion e se far veder. A la dir duta no ere tant per chela de seghitar a registrar, l era istà, l era da jir do

fegn e gio ere massa ciapà dal lurier. E dapò no l é che le me aesse ciapà chele touse, no l é vegnù fora nia... Te l'ultima puntata, endana na cena, se cognea dezider e gio son stat sobito chiar, ge é dit che aee abù piajer de la cognoscer ma che no l é nasciù nia.

No te aste enamorà donca?

Na, na, no me é nience pa passà tel ciaf... fin dal scomenz. A te dir la verità con cinch dis demò de temp che veste capir. L é ben vera che ge vel cinch secondi per entener se na persona la é per te o no, anzi per far l bacan ge vel ence demò doi secondi, tu capesce sobito se na tousa la é portada.

Che te à dit a ciasa che tu fajee n reality?

I saea che no ere tant a una, ge é dit che la tole desche na esperienza.

E ades che te dijei chi che te à vedù a la televijion?

Ades canche vae zaolà i me recognosc e i me chiama l Nol ence jent che no fac part del mond di bachegn. E a Soraga a dir la verità no sé, no son mai, vegne ite demò a dormir.

Che te él restà de chesta esperienza?

La part più bela che me portaré do duta la vita l é l'amicizia coi autres concoren, che i era mingol da duta la Talia, sion doventé desche frades, chesta l é stat la roba più bela. Se sention duc i dis, ence ic i la pissaa desche gio sul reality.

N fajesseste amò?

Na, na, nia più reality. I volea massa sfaussar la realtà, i volea far scene più piziente, n bos a una, n bos a n'otra, che vegne fora mingol de gelosie, na, na chest no l é per me... per ades me gode la vita, stae ben da soul, cogne ge star do a l'azienda, mie moment de me enamorar l rua pa ben.

Intervista de Monica Cigolla